

दिनांक 09.12.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- 'प्रवासी राजस्थानी दिवस समारोह' काल—परदेसियां रो जयपुर पूगबा रो सिलसिलो जारी।
- राज्य सरकार नौनेरा वृहद पेयजल परियोजना अर परवन—अकावद पेयजल परियोजना ने मंजूरी दी।
- गृह मंत्री अमित शाह राज्यसभा मांय वंदे मातरम् माथे खास चर्चा मांय इण ने देशभक्ति, बलिदान अर राष्ट्रीय चेतना रो प्रतीक बताया।
- केन्द्र सरकार खाद री कालाबाजारी अर जमाखोरी करबा वाळा डीलरां ने करीब 13 हजार नोटिस जारी कर्या।

000

जयपुर मांय काल 'प्रवासी राजस्थानी दिवस 2025' मनायो जावेला। इण समारोह मांय भाग लेबा खातर देश—विदेश रा सैंकडू प्रवासी राजस्थानी जयपुर पूग रिया है। ओ कार्यक्रम सुंवारे 10 बज्यां सूं जेईसीसी सभागार मांय सरू व्हेला अर खास जळसो दोपहर मांय व्हेला। समारोह रा उदघाटन सत्र मांय मुख्यमंत्री भजनलाल शर्मा रो खास उद्बोधन व्हेला। मुख्यमंत्री रे अलावा उदघाटन जळसा मांय राज्यपाल हरिभाऊ बागडे, पंजाब रा राज्यपाल गुलाब चंद कटारिया, केंद्रीय वाणिज्य अर उद्योग मंत्री पीयूष गोयल भी शामिल व्हेला। समारोह रा आठ सेक्टर मांय सेक्टर—स्पेसिफिक कल्चरल सेशन व्हेला, इण मांय रिन्यूएबल एनर्जी, पर्यटन, शिक्षा, उद्योग, स्वास्थ्य, जल संसाधन अर माइनिंग भेळा है। इण कार्यक्रम मांय भाग लेबा खातर 2 हजार 700 सूं बत्ता प्रवासी आपरां पंजीकरण करवाया है। इण बाबत जयपुर मांय गाढी तैयारियां करी गई है, शहर ने खास तौर ऊं सजायो गयो है। उद्योग आयुक्त सुरेश ओला बताया के प्रवासियां री यात्रा रा अनुभव ने यादगार बणाबा खातर खास तैयारियां करी गई हैं।

.....

इण आयोजन री सरूआत राजस्थान री विकास यात्रा अर वर्तमान सरकार रा कार्यकाल मांय व्हीया विकास कामां री झलक दिखाबा वाळी प्रदर्शनी 'प्रगति पथ' रा उदघाटन रे सागे व्हेला। इण रे पाछे उद्योग अर वाणिज्य मंत्री कर्नल राज्यवर्धन राठौड रो स्वागत उद्बोधन व्हेला। म्हाका खबरनवीस रे मुजब इण कार्यक्रम मांय देश—विदेश रा केई जान्या—मान्या लोग भेळा व्हेला।

.....

000

मुख्यमंत्री भजनलाल शर्मा कोटा, बूंदी, झालावाड़ अर बारां जिलां खातर दो बड़ी पेयजल परियोजनावां ने मंजूरी दे दी। ये परियोजनावां— नौनेरा वृहद पेयजल परियोजना अर परवन—अकावद पेयजल परियोजना है। सरकार जल जीवन मिशन रे तैत इण रो कार्यादेश जारी कर दीनो है। आ दोन्यू परियोजनावां माथे कुल 5 हजार 184 करोड़ रुपया खर्च व्हेला। आ ने अगस्त 2027 तांई पूरो करबा रो लगस है, जिण सूं आं जिलां रा लाखों लोगां ने साफ पीबा रो पाणी मिल सकेला। नौनेरा परियोजना खातर 1 हजार 661 करोड़ रुपया मंजूर व्हीया है। इण मांय कोटा अर बूंदी जिला रा 749 गांव अर 6 कस्बा रा करीब 1 लाख 13 हजार परिवारां ने पाणी मिलेला। परवन—अकावद परियोजना खातर 3 हजार 523 करोड़ रुपया मंजूर व्हीया है। इण सूं झालावाड़, बारां अर कोटा रा सांगोद हलका रा कुल 1 हजार 402 गांवां रा करीब 1 लाख 52 हजार परिवारां ने फायदो व्हेला।

000

शिक्षा राज्य मंत्री डॉ. सुकांत मजूमदार स्मार्ट इंडिया हैकेथॉन-2025 रा हार्डवेयर एडिशन रा प्रतिभागियां सूं इमदाद अर ज्ञान आधारित समाधान माथे काम करबा री अरज करी है। जयपुर री मणिपाल यूनिवर्सिटी मांय चाल रिया हैकेथॉन रा दूजा दिन आज डॉ. मजूमदार प्रतिभागियां सूं बातचीत करी। इण दौरान प्रधानमंत्री नरेन्द्र मोदी रो खास वीडियो संदेश साझो कर्यो गयो। प्रधानमंत्री आपरा संदेश मांय युवा प्रतिभावां ने नवाचार मांय आपरी क्षमता ने आगे बढ़ाबा अर तकनीक रे जरिये राष्ट्र निर्माण मांय योगदान देबा ने कया। हैकेथॉन री वजह सूं पूरा परिसर मांय गहन एकाग्रता, टीमवर्क अर तकनीकी नवाचार रो उच्छाव सूं भरयो माहौल देखबा ने मिल्यो।

000

गृह मंत्री अमित शाह कया के राष्ट्रीय गीत वंदे मातरम देशभक्ति, बलिदान अर राष्ट्रीय चेतना रो प्रतीक है, जो कि स्वतंत्रता आंदोलन रो रास्तो दिखायो। आज राज्यसभा मांय वंदे मातरम री 150वीं वर्षगांठ माथे चर्चा री सुरूआत करता थकां श्री शाह कया के आ अमर कृति भारत माता री कानी कर्तव्य अर समर्पण रा भाव जगावे है।

.....

श्री शाह कया के वंदे मातरम रे जरिये बंकिमचंद्र चट्टोपाध्याय देश ने माता रा रूप मांय पूजबा री परंपरा अर सांस्कृतिक राष्ट्रवाद री थापना करी। गृह मंत्री कया के दोन्यू सदनां मांय वंदे मातरम माथे चर्चा सूं आवती पीढ़ियां ने इण ने समझबा मांय इमदाद मिलेला। चर्चा मांय भाग लेता थकां राज्यसभा मांय विपक्ष रा नेता मल्लिकार्जुन खड़गे कया के कांग्रेस स्वतंत्रता संग्राम रे दौरान वंदे मातरम रो नारा बणायो हो। श्री खड़गे कया के वंदे मातरम गीत भारत रा सार्वजनिक जीवन मांय जद आयो जद गुरुदेव रवींद्रनाथ टैगोर 1896 मांय कलकत्ता मांय कांग्रेस अधिवेशन मांय इण ने पहली बगत गायो हो।

000

सरकार कालाबाजारी, जमाखोरी अर गुणवत्ता री अणदेखी माथे राष्ट्रव्यापी कार्रवाई रे तैत लारला सात महीनां मांय उर्वरक डीलरां ने 12 हजार 814 कारण बताओ नोटिस जारी कर्या है। राज्यसभा मांय प्रश्नकाल रे दौरान केंद्रीय रसायनिक अर उर्वरक मंत्री जे पी नड्डा आ जाणकारी दी। रसायन री कमी सूं जुड़्या एक सवाल रा जवाब मांय श्री नड्डा कया के सरकार पारदर्शी अर वास्तविक समय माथे आधारित एकीकृत उर्वरक निगरानी प्रणाली रे जरिये उर्वरक री जरूरत माथे निगरानी राख री है।

000

जयपुर ग्रामीण सांसद राव राजेंद्र सिंह लोकसभा मांय एक निजी विधेयक पेश कर देश रो नाम 'इंडिया' री ठोड़ केवल 'भारत' राखबा री मांग करी है। सांसद बताया के ओ विधेयक संविधान रा अनुच्छेद 1 मांय संशोधन खातर लायो गयो है, जिण सूं देश रो आधिकारिक नाम केवल 'भारत' व्हे जावे। वे कया के 'भारत' नाम म्हाकी प्राचीन परंपरावां अर इतिहास सूं जुड़्यो है, जो म्हाकी एकता अर आत्म-पिछाण रो प्रतीक है।

.....

000

केंद्रीय विमानन मंत्री राम मोहन नायडू कया के इंडिगो रा हाल रा हालात मांय तेजी सूं सुधार व्हे रियो है। वणा दोहरायो के सरकार मजबूत विमानन प्रणाली बणाबा खातर पूरी भांत प्रतिबद्ध है। इंडिगो रा मौजूदा संकट माथे लोकसभा मांय श्री नायडू बताया के इंडिगो ने पूरी भांत जवाबदेह ठहरायो जा रियो है। वे कया के नागर विमानन महानिदेशालय विमानन कंपनी ने नोटिस जारी कर्यो है अर उण री रपट रा आधार माथे कड़ी अर उचित कार्रवाई करी जावेला। श्री नायडू इण बात माथे भी जोर दिया के यात्रियां री सुरक्षा सूं समझौतो नी व्हेला। वे कया के हालात सामान्य होबा ताई सरकार पूरी भांत सावचेत रहवेला।

000

भीलवाड़ा कृषि महकमा रा अतिरिक्त निदेशक, इंदर सिंह संचेती, भीलवाड़ा, चित्तौड़गढ़ अर राजसमंद रा काश्तकारां सूं यूरिया खाद रा बत्ता इस्तेमाल माथे रोक लगाबा ने कया। वणा सलाह दी के

काश्तकार एक बीघा मांय केवल 10 सूं 15 किलो यूरिया खाद रो ही छिड़काव करें। बत्तो यूरिया डालबा सूं फसलां माथे बुरो असर पड़े है।

.....

000

श्रीगंगानगर जिला रा सादुलशहर कस्बा मांय एक मकान मांय गैस सिलेंडर लीक होबा री वजह सूं भीषण आग लाग गयी। इण हादसा मांय दो महिलावां समेत कुल पांच लोग झुलस गया। आग री सूचना मिलता ही इलाका मांय अफरा-तफरी मच गयी। वठै रा रेहवासियां री इमदाद सूं आग माथे काबू कर्यो गयो। सगळा घायलां ने सादुलशहर रा सरकारी सफाखाना मांय पूगायो गयो, जठे वां रो ईलाज चाल रियो है।

000

चित्तौड़गढ़ जिला रो किशन करेरी तालाब आं दिनां प्रवासी परिन्दां री वजह सूं सैलाणियां ने रिझा रियो है। हर बरस री भांत इण बगत भी हजारों किलोमीटर दूर सूं हजारो परिन्दा अठे पूगे है। सर्दी रे सरू होता हीं अक्टूबर सूं अठे बार-हेडेड गूज, नॉर्दन शोवलर अर सारस जेडी केई प्रजातियां रा पाखी घणी तादाद मांय देख्या जावे है। आं परिन्दा री अठखेलियाँ सेलाणियां मांय रोमांच भर री है। म्हाका खबरनवीस रे मुजब ओ सिलसिलो फरवरी-मार्च ताई चालेला, इण रे पछे ये पाखी आप-आपरा देश लौट जावे है।

.....

000